

關誣編

·No 122

關誣編

No 122

1000 9-1933

國立北平圖書館藏

CALUMNIARUM REFUTATIO

4<sup>a</sup> editio

南  
京  
主  
教  
惠  
重  
准

天主降生一千九百三十三年

上海土山灣印書館第四版印

闢誣編

念吾天主教。至公至一。極聖極神。聖賢以之修己安人。朝野以之齊家治國。凡有血氣者。莫不當從。詎知有不肖之徒。近刻諱姓邪書。匿名揭貼。妄加毀謗。污穢教名。考其所述。則言言虛僞。字字荒唐。教士與商人。未知分辨。屢教與真教。未克詳明。更有醜惡不堪者。言之無忌。其心之不正。自可知已。蓋言者心之聲也。志道德者言道德。志功名者言功名。彼輩所志。惟淫佚貨利。亦何怪其言淫佚。言貨利也。幾希已失。義理不知。既與禽獸無殊。亦何容與之多辨。但恐閱是書者。受其誣惑。信其誑荒。以致舍正路而弗由。悞歧途而不返。是則吾所深惜者也。因述是編。名曰闢誣編。用以申明真道。稍釋疑懷云。天主者萬有真原。至德難名。至誠無妄。其爲體也。先先而無元。後後而妙有。淵淵浩浩。無臭無聲。其爲用也。造作神人。化生萬彙。天爲其製。地爲其造。掌

握存養。瞬息不離。其爲教也。彌六合。拓八垓。建自生初。傳至世盡。特是教無二旨。而名稱有殊。蓋上古民皆誠樸。道載人心。率降衷之知能。謹言慎行。瞻宇宙之蕃藪。飲水思源。其時率性爲道。以崇真主。是爲性教。厥後物欲相循。遂致秉彝自昧。澆漓日甚。真性日昏。天主親示誠規。命人凜守。是爲書教。又因魔計惑人。早絕升天正路。人力不足。莫修補過宏功。於是天主慈衷。矜憐斯世。時當西漢哀平之際。降世爲人。天主性與人性。兼於一位。名曰耶穌。幼登講席。壯歷名邦。在世三十三載。不過立表示人。行善濟人。一言一語。能使聾者聰。瞽者明。癩者淨。跛者趨。啞能言。枯骸復活。且以愛人至極。自願代死立功。則其被徒負賣。十架釘鎗。皆出之甘心。而非不得不然者。亡後第三日。自死復生。顯然現世。定規立教。傳授宗徒。四旬已逆。率徒百餘人。至高山嶺。獨力騰空。上升天國。此皆眾目昭彰。著在經典。猶吾國之有孔子。雖非目

親。有不可不信者也。若論立教要旨。以昭事真主爲宗本。以忠孝慈愛爲工夫。以悔罪投誠。預備生死大事爲究竟。以天堂地獄。爲彰善癉惡之大經。以日鑑在茲。爲自警自勉。一室藏修之實學。以十誠嚴規。七端聖事。爲趨善避惡。積德立功之要助。試以十誠總旨言之。則欽崇天主。不事邪神。虛誓害人。不容妄發。一日中誦經有課。一年內瞻禮有期。工別神形。齋嚴大小。以求後惠。以報前恩。猶之爲人臣者。朔望朝君。謝恩祝福。理當然也。敬天主外。首重孝親。生則養。致敬盡愛。歿則思。代禱通功。帝王官長。視如父母。守法奉公。子來無懈。爲主愛人。必如愛己。故圖報仇讐。謀害性命。公庭妄証。讒言毀人等。盡屬犯誠。概爲不容。凡取之非義。得之不公。竊攘侵奪。勒索錢財。盡應補償。方爲合理。教中惟許正色。嚴禁邪淫。非惟不准私姦。不能娶妾。卽色慾隱念。眷戀邪情。亦如火入胸懷。速應撲滅也。一切懿訓良規。不能盡述。惟願志士

達人考諸教中經典。於以得聖教之實學焉。

夫道無奇則不傳。教無宗則必亂。天主聖智。燭照無遺。爲此簡定宗徒之長聖伯多祿。爲教中元首。世上教皇。俾道統有歸。神權有屬。後之接位者。德本超群。才皆濟世。有禪無繼。依然揖讓風行。覺世牖民。恒作中流砥柱。當今教化皇庇護第九位。躬承大統。居羅馬京都。掌普天教會。凡主教司鐸。皆其所遣。以傳聖教。以斥異端。今天下萬國萬民。奉其教。服其令。被其恩澤者。不下二百餘兆。下兼士庶。上至君王。莫不奉若帝皇。愛如父母。卽中國之有天主教。亦傳述有年。並非新舉。蓋自唐貞觀九年。有傳教士奉天主教經像來獻。太宗嘉悅。天下詔行。前明萬歷年間。有利瑪竇。艾儒畧等。跋涉長途。來遊中土。秉純全之德。負奇穎之資。大爲諸當道所敬服。薦達闕廷。特蒙寵錫。建堂傳教。德化聿隆。康熙五十三年三月。勅建天主堂告成。是月十五日御書萬

有真原。匾額一面。又對聯一副。無始無終。先作形聲真主宰。宣仁宣義。聿昭拯濟大權衡。差內大臣送至天主堂懸掛。俱御製宸翰。時有泰西南懷仁等。或殫精推算。歷定永年。或効力疆場。炮曾監造。或著書立說。指示真修。或格物窮源。發明聖教。至今冊簡尙存。昭然有據。自道光二十二年。英國來華。通商結約。由是英教傳入中國。彼教之規矩章程。禁令道理。余皆不論。但知三百年前。英國本奉天主聖教。與吾同宗。嗣後脫離本根。自成一教。名曰耶穌教。故其傳教之士。非吾聖教宗所遣。而爲其國王所發也。至論吾教之士。立身清潔。履道高明。戰勝三仇。功勤四勿。絕色慾。終身不娶。輕世物。貨利無沾。等富貴如浮雲。視宴安如鳩毒。櫛風沐雨。欲傳普世真光。去國離鄉。願造群生福命。待人恩愛。哀憐殘疾疲癯。捐己錢財。收養鰥寡孤獨。如義學。醫局。公墓。聖堂。育嬰堂。安老院等。種種善事。耳目昭然。非能屈指也。



由此觀之。天主教正人心。明至理。風世俗。護身靈。南朔東西。無思不服。獨彼也不良。肆行詆毀。誣以西洋邪教。方外旁門。其妄一也。耶穌既是真主人。至仁至聖。其療病活死。悉本全能。被賣釘鎗。都由自願。則彼輩誣以身且不保。安能福人。又擬以扁鵲華陀。一人能救幾何。其妄二也。大英教非天主教。英教師非真教士。彼等是非不辨。邪正不分。而一體悞之。其妄三也。天主教士。圭壁禪躬。冰霜厲志。被誣以耽聲色。循私慾。聲影生疑。鴉鸞並視。其妄四也。傳教士專奉教化皇聖旨。傳道勸人。不與行商。不參國政。而彼誣以覬覦有意。貨利爲心。其妄五也。教規以孝親敬長爲先。以奉上尊君爲重。彼誣以不分長幼。不敬祖宗。其妄六也。全守教規者能膺福報。不守教規者墜獄示殃。而彼誣以不問良莠。旣入吾教。概可升天。其妄七也。金銀爲地土之精華。非人力所能強致。况形骸土木。一死歸灰。欲以此成金。神鬼所不能。愚頑所

不信。且誰無父母。誰無妻孥。如果有剜目剖心之舉。將斥之不及。誅之不容。豈得中國人民。入教愈多。歸真日盛耶。然則彼等誣傳教士。以取目成金。取血成丹等事。其妄入也。其餘醜惡謊詞。不堪齒及者。可不辨而自知其虛僞矣。

要知聖道光明。逾於日月。縱有風雲多變。不過增其雨後晴光。蓋正道循理。拂人私慾。故匪徒謀害。無地無之。非今斯今。振古如茲也。但天主教自有天主掌管。將永遠顯揚。不能毀滅。彼輩讒毀。不過害己害人。白日當前。依然閉目。至死後辨明真僞。已悔之無及矣。吾教中爲主愛人。不但無所懷恨。且爲彼等祈求天主。使能棄邪歸正。并令萬民共登仁壽。中國盡躋雍熙。是則吾所切望者也。

2

772402

772402